



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Dili

31 Julu 2015

Ministériu Públiku alega tinan 10 ba arguidu Calistro Gonzaga relasiona ho kazu la partisipasaun no sequestru

Iha 27 Julu 2015, Tribunál Distritál Dili alega arguidu Calistro Gonzaga ho pena prizaun tinan 10 relasiona ho krime la partisipasaun no sequestru ne'ebé nia komete. Kazu ne'e akontese iha 20-26 Outubru 2012.

Ministériu Públiku alega katak arguidu provadu komete krime la partisipasaun no sequestru tanba arguidu nu'udar Komandante Investigasaun Kriminál PNTL, detein no husik sidadaun Indonezia na'in 4 no Afrikanu na'in 1 ne'ebé involve iha krime droga hodi fila ba autóridade *Badan Narkotika Nasional (BNN)*, Indonezia. Ministériu Públiku prova liuhosi dokumentus hanesan pasaporte, asinatura entre arguidu no BNN relasiona ho prosesu transferensia ba suspeitu nain lima refere.

“Kazu ne'e sai sasukat ba kredibilidade instituisaun judisiáriu. JSMP fiar katak tribunál sei halo desizaun tuir deit faktu sira ne'ebé produz durante julgamentu sein influenciadu kualker forma presaun ne'ebé la partense ba norma no prinsípiu prosesual aplikavel sira, “dehan Diretor Ezekutivu JSMP, Luis de Oliveira Sampaio.

Ministériu Públiku haktuir katak nu'udar komandante investigasaun kriminál arguidu hatene klaru kona-ba ministériu públiku mak nu'udar nain ba asaun penál hotu-hotu. Maibé iha kazu ne'e, arguidu tenta desvia-an hosi prosesu ne'e no lori fila suspeitu sira ba Indonezia sein koñesimentu hosi ministériu públiku rasik.

Iha prosesu ne'e, ministériu públiku husu ba tribunál atu altera tiha artigu 297 Kódigu Penál kona-ba abuza podér ne'ebé antes ne'e akuza ba arguidu ba fali iha artigu 160 Kódigu Penál kona-ba krime sequestru no mantein artigu 286 Kódigu Penál kona-ba krime la partisipasaun.

Bazeia ba pozisaun ne'e, ministériu públiku husu ba tribunál atu aplika pena prizaun tinan 20 ba arguidu relasiona ho krime sequestru tanba arguidu detein suspeitu nain lima no ministériu públiku husu pena tinan 4 ba kada suspeitu. Entretantu ba krime la partisipasaun, ministériu públiku husu ba tribunál atu aplika pena prizaun tinan 5 nune'e arguidu hetan pena tinan 25.

Rua setubal, Colmera, Dili Timor Leste

PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Hosi krime diferente rua ne'e tribunál akumula hodi aplika pena únika tinan 10 prizaun ba arguidu.

Iha parte seluk, defeza argumenta katak arguidu hala'o orden hosi Ministru Defeza no Seguransa nu'udar nia superior, ne'ebé orienta atu nia entrega suspeitu na'in lima ba fali nasaun Indonezia. Nu'udar subordináriu, arguidu iha dever atu kumpri orientasaun ne'e no husik sidadaun na'in lima ne'e la'os arguidu nia iniciativa rasik.

Defeza argumenta liutan katak arguidu detein suspeitu na'in lima ne'e hanesan estratejia ida atu halo vijilansia, nune'e suspeitu sira la halai tanba antes ne'e iha ona informasaun hosi BNN ba iha PNTL kona-ba involvimentu suspeitu nain lima iha krime droga. Arguidu mós la hetan benefísiu direita no indireita hosi suspeitu sira ka ema seluk relasiona ho haruka fila ema hirak ne'e ba Indonezia. Tanba razaun hirak ne'e, defeza husu ba tribunál atu absolve arguidu.

Aleinde ne'e, ministériu públiku mós husu ba tribunál atu loke prosesu inkéritu hasoru testemuña Kay Rala Xanana Gusmão nu'udar Ministru Defeza no Seguransa ne'ebé iha tempu ne'ebá fo orden no orientasaun ba arguidu hodi halo vijilansia ba suspeitu nain lima no kontinua lori sira ba Indonezia no tribunál aseita ho pedidu hosi ministériu públiku.

Depois rona tiha alegasaun finál hosi ministériu públiku no defeza, tribunál marka fali ba iha 17 Setembru 2015, tuku 11:00 dader ho ajenda leitura akordaun.

Kazu ne'e rejistu iha tribunál ho Número Prosesu: 1227/12. PDDIL. Prosesu rezulgamentu ne'e prezide hosi juis kolektivu, Dr. Jose Maria de Araujo, Dra. Jumiati Maria Freitas no Dra. Maria Solana (estajiária). Enkuantu Ministériu Públiku representa hosi Dra. Angelina Saldanha no arguidu hetan defeza husi Dr. Sergio Quintas husi Eskritóriu Defensória Públiku.

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org